

आकाशवाणी

खबरां ----

1. लोकसभा च अज्ज आपरेशन सिंदूर बारै इक विशेष परिचर्चा शुरू होई, राज्यसभा च विरोधी पार्टिएं बक्ख-बक्ख विषयें पर खूब डंड रौली पाई जेदे चलदे कार्रवाई दिन भरे लेई स्थगित करनी पेई।
2. सरकारै आखेआ ऐ जे पिछले 5एं बरें च प्रधानमंत्री हुनर विकास योजना तैहत 53 लक्ख कोला मते नोजवानें गी सिखलाई दिती गई ऐ।
3. केंद्री धरत विज्ञान मंत्री डॉ. जितेंद्र सिंह होरें अज्ज मंत्रालय तैहत बक्ख-बक्ख संस्थानें आसेआ तैयार कीते गेदे 14 प्रमुख उत्पादें दी शुरूआत कीती।
4. जम्मू-कश्मीर च डाचीगाम दे जंगलें च छिड़े दे इक टाकरे दरान सुरक्षाबलें त्रै आतंकवादिएं गी मारी मकाया ऐ।
5. बम्बई शेयर बजार दा संवेदी सूचकांक अज्ज 572 अंक झिगड़ा आइयै 80 जहार 891 पर बंद होआ।
6. जॉर्जिया च फिडे महिला शतरंज विश्व कप-2025 दे फाइनल च दिव्या देशमुख नै भारत दी गै कोनेरू हम्पी गी हराइयै इतिहास रची दिता ऐ।

<><><><><><>

Jitender Singh

धरत विज्ञान मंत्री जितेंद्र सिंह होरें अज्ज मंत्रालय दे तैहत बक्ख-बक्ख संस्थानें आसेआ तैयार कीते गेदे 14 प्रमुख उत्पादें दा शुभारम्भ कीता। इन्दे च बरखा पर नजर रखने, फसल मौसम कलेंडर, मौसम दी पेशगी जानकारी देने आहलियां उन्नत प्रणालियां, मती रेजोल्यूशन आहला बरखा डेटासेट, तरंग एटलस ते समुंद्र तल चार्ट, ब्हा दी गुणवत्ता सरबन्धी पूर्ण अनुमान प्रणालियां, समुंद्री जीवें दी बन सबन्नता बारें रिपोर्ट ते चार भारती शैहरें दे भूंचाल सूक्ष्म क्षेत्रीकरण अध्ययन जनेए उत्पाद शामिल न। नमी दिल्ली च मंत्रालय दे 19में स्थापना दिवस दे मौके पर डॉ. सिंह होरें आखेआ जे विज्ञान ते नवाचार औने आहले दाहकें भारत च आर्थिक उत्थान च मती महत्वै आहली भूमिका निभाग।



Heavy-Industry Scheme

भारी उद्योग मंत्रालय नै अज्ज नमी दिल्ली च डॉ. श्यामा प्रसाद मुखर्जी हुंदी 125मीं जयंती दे सिलसिले च इक विशेष लेक्चर दा सरिस्ता कीता। इस मौके पर भारी उद्योग मंत्री भूपतीराजू श्रीनिवास वर्मा होरें संविधान सभा दे सदस्य ते केंद्री उद्योग ते बंड बिक्री मंत्री दे रूपै च डॉ. मुखर्जी हुंदे महत्वपूर्ण योगदान दा जिक्र कीता। उनें भारत दे औद्योगिक ते संस्थान विकास च डॉ मुखर्जी हुंदे योगदान दा जिक्र कीता। अपने संबोधन च उनें आखेआ जे डॉ. श्यामा प्रसाद मुखर्जी इक विद्वान, राजनेता, दलेर नेता, हिम्मती सांसद ते अक्वल दर्जे दे शिक्षाविद हे, जिंदा जीवन हिम्मत, दलेरी, दृढ़ विश्वास ते इक्क राष्ट्र इक संविधान च गैहरा विश्वास हा। कार्यक्रम च डॉ. श्यामा प्रसाद हुंदी विरासत ते योगदान गी समर्पित इक शार्ट फिल्म बी दस्सी गई।

<><><><><><>

SC-ECI

सुप्रीम कोर्ट नै बिहार च मतदाता सूचिएं दी तफसीली नजरसानी लेई निर्वाचन आयोग दे तैहशुदा कार्यक्रम मूजब पेहली अगस्त गी मसौदा मतदाता सूचि प्रकाशित करने पर रोक लाने संवा इंकार करी दिता ऐ। न्यायमूर्ति सूर्यकांत ते न्यामूर्ति जॉय माला बागची हुंदी पीठे एहदे पर तफसील च सुनवाई नेही कीती कीजे न्यायमूर्ति सूर्यकांत होरें गी मुख्ख न्याधीश हुंदे कन्नै इक प्रशासनिक बैठका च हिस्सा लैना हा। अजें कि पीठे अर्जी दाखल करने आहलें गी भरोसा दोआया ऐ जे इस मामले दी सुनवाई तौले कीती जाग। एसोसिएशन फॉर डेमोक्रेटिक रिफार्म्स दी तरफा एडवोकेट गोपाल शंकरनारायणन होरें अदालतै च इस प्रकाशन गी रोकने लेई गुजारश कीती दी ऐ।

<><><><><><>

Encounter

श्रीनगर दे दाचीगाम इलाके दे जंगलें च सुरक्षाबलें ते आतंकवादिएं बशकार होए दे टाकरे च त्रै बेपंछानू आतंकवादी मारे गे न। श्रीनगर आधारित सेना दी चिनार कोर नै जानकारी दिती ऐ जे अभियान अजें जारी ऐ। आतंकवादिएं दा किस गुट कन्नै सरबंध ऐ ते उंदी पंछान केह ऐ, इस बारै अजें पता लाया जा'रदा ऐ। सुरक्षाबलें पहलगाम आतंकवादी हमले जेदे च 26 लोक मारे गे हे, मगरा इस लेई जिम्मेदार आतंकवादिएं दी धरपकड़ लेई इक व्यापक अभियान रम्भेआ। पिछले इक म्हीने थवां हासिल होआ'रदी खुफिया जानकारिएं मूजब आतंकवादी श्रीनगर शैहर थवां 20 किलोमीटर अंदर जंगलें च

नस्सी गेदे न। तोआई, सेना दी उत्तरी कमान प्रमुख लेफ्टिनेंट जनरल प्रतीक शर्मा हों
चिनार कोर दी उंदी कारवाई लेई सिफत कीती।

<><><><><><>

Announcement

आकाशवाणी दा समाचार सेवा प्रभाग अज्ज रातीं साइडे 9 बजे फोन इन कार्यक्रम
पब्लिक स्पीक च हेपेटाइटिस कोला बचाव ते एहदा इलाज विषय पर इक परिचर्चा
प्रसारत करोग। एहदे च हिस्सा लैने लेई स्हाड़े दिल्ली स्टूडियो च मजूद रौहंगन
आई.एल.बी.एस अस्पतालै च हैपाटोलोजी विभाग च एसोसिएट प्रो. डॉ. विशाल अरोड़ा।
श्रोता इस बारे कोई बी सोआल पुच्छने लेई इनें नंबरें पर फोन करी सकदे न। नंबर न
011-23717117 ते दुआ नंबर ऐ 011-23314444. एहदे अलावा श्रोता वट्सऐप नंबर
9289094044 पर बी अपना सोआल पुच्छी सकदे न। हैशटैग आस्क एआईआर दे कन्ने
एक्स प इस बारे सोआल कीते जाई सकदे न।

<><><><><><>

Chess-Update

जार्जिया दे बटुमी च फिडे महिला विश्व कप 2025 दे फाइनल च भारत दी गै कोनेरु
हम्पी गी हराइयै इतिहास रची दिता ऐ। इस जित कन्ने दिव्या देशमुख गेंडमास्टर दा
खिताब हासल करने आहली चौथी भारती महिला बनी गेइयां न।

<><><><><><>

Share-Market

बम्बई शेयर बजार दा संवेदी सूचकांक अज्ज 572 अंक झिगड़ा आइयै 80 ज्हार 891 पर बंद होआ। नेशनल स्टॉक एक्सचेंज दा निफ्टी बी 156 अंक हेठ 24 ज्हार 681 पर आई गोआ।

<><><><><><>

Budha-Amarnath

श्री बुड्ढा अमरनाथ जी दी जातरा दे पैहले जत्थे दा अज्ज जातरा स्टेशन राजौरी च डिप्टी कमिशनर अभिषेक शर्मा, विधायक इफितखार अहमद ते एसएसपी गौरव शिकारवर होरें स्वागत कीता। 901 श्रद्धालुएं दे इस जत्थे च 664 मर्द, 277 महिलां, 2 साधु ते 18 बच्चे शामिल हे। इस दरान अटल पीठादेश्वर श्री-श्री 1008 स्वामी विश्वात्मा नन्द सरस्वती जी महाराज बी उत्थे मौजूद हे। डिप्टी कमिशनर होरें तीर्थ जात्रियें लेई कीती गेदी सुविधाएं दा जायजा लैता जेदे च पीने आहला साफ पानी, बिजली सप्लाई, शौचालय दी सुविधा, लंगर, सुरक्षा बवस्था बगैरा शामिल न।

<><><><><><>

Amarnath-Yatra

3 जुलाई थवां शुरू होई दी श्री अमरनाथ जी दी जातरा तैहत अर्जे तगर 3 लकख 77 ज्हार श्रद्धालुएं पवित्तर गुफा च मत्था टेकेआ ऐ। कल श्रीनगर दे दशनामी अखाड़ा ईमारत दे अंदर छड़ी सत्यापन समारोह होआ। छड़ी पूजन कल अमरेश्वर मंदर श्रीनगर च छड़ी पूजन होग। 4 अगस्त गी छड़ी मुबारक गी पवित्तर गुफा लेई रवाना कीता

जाग। 9 अगस्त गी पवित्तर छड़ी अमरनाथे दी गुफा च पुज्जोग जेदे मगरा इस बारे दी
अमरनाथ जी दी जातरा सम्पन्न होई जाग।

<><><><><><><>

Compassionate-Appointment

उपराज्यपाल मनोज सिन्हा होरें सुर्गवासी डॉ. राज कुमार थापा हुंदे परोआर कन्नै मलाटी
कीती। थापा होर पाकिस्तानी बलें आसेआ राजौरी च कीती गेदी गोलीबारी च शहीद होई
गे हे। बैठक दरान उपराज्यपाल होरें डॉ. थापा हुंदी धीस गी सहायक कन्नू अधिकारी
नियुक्त करने सरबंधी आश्वासन पत्र भेंट कीता। एहदे च भरोसा दोआया गेआ ऐ जे
जिसले ओह अपनी पढ़ाई पूरी करी लैडन तां उनेंगी इस ओहदे पर तैनात कीता जाग।
उपराज्यपाल होरें डॉ. थापा हुंदे परोआर कन्नै अपनियां संवेदना जाहिर कीतियां ते
प्रशासन आसेआ हर संभव सहायता दा भरोसा दोआयां इस मौके पर जम्मू दे डिविजनल
कमिशनर रमेश कुमार होर बी मौजूद हे।

<><><><><><><>

Weather

मौसम विभाग नै अज्ज पूर्वी राजस्थान च किश थाहरें पर मौलेधार बरखा होने दी
चेतावनी दिती ऐ। तटीय कर्नाटक, गुजरात, उत्तराखंड, बिहार, पश्चिमी राजस्थान, उप-
हिमालयी पश्चिम बंगाल, सिक्किम, पश्चिमी उत्तर प्रदेश ते पूर्वोत्तर राज्यें च बी अगले
दो-त्रै दिनें दरान तेज बरखा होने दी मेद ऐ। विभाग मूजब अज्ज अंडमान ते निकोबार
द्वीप समूह, बिहार, पश्चिम बंगाल दे गांगेय क्षेत्र, जम्मू ते कश्मीर, झारखंड, ओडिशा
ते तेलंगाना दे किश हिस्सें च गरज कन्नै हल्की बरखा दी मेद ऐ। अंडमान ते निकोबार

द्वीप समूह, आंध्र प्रदेश, कर्नाटक, केरल, माहे, लक्षद्वीप, ओडिशा, तमिलनाडु, पुदुचेरी ते कराईकल च अज्ज तेज हवामां चलने दी बी मेद ऐ। तोआई, मौसम विभाग नै अज्ज पूर्वी राजस्थान दे 5 जिले, कोटा, बारां, सवाई माधोपुर, करौली ते भरतपुर च भारी बरखा दा रेड अलर्ट जारी कीता ऐ। बारां, अजमेर, इंगरपुर, कोटा, ब्यावर, भीलवाड़ा ते सलूमबर समेत कई जिले च प्रशासन नै अज्ज ते कल आस्तै स्कूलें च छुट्टियां घोषित करी दिती दी ऐ। धौलपुर जिला प्रशासन नै 30 जुलाई तगर सब्बै स्कूलें ते आंगनवाड़ी केंद्रें च छुट्टियां घोषित करी दितियां न। राज्य दे दक्खन -पूर्वी दस जिले आस्तै ऑरेंज अलर्ट जारी कीता गेआ ऐ जदके कई जिले आस्तै तेज बरखा दा येलो अलर्ट जारी कीता ऐ। मौसम विभाग जयपुर मूजब अगले त्रै थमां चार दिनें तगर राज्य च भारी बरखा जारी रौहग। राज्य च पिछले 24 घंटों दरान पूर्वी राजस्थान च कई थाहरें पर मौलेदार बरखा दर्ज कीती गेई।

<><><><><><>

LS-OP Sindoor

लोकसभा च अज्ज आपरेशन सिंदूर पर बशेष चर्चा शुरू होई। चर्चा दी शुरूआत करदे होई रक्षा मंत्री राजनाथ सिंह होरें पहलगाम च होए दे आतंकी हमले खलाफ इस कार्रवाई गी भारत दी सशक्त, सफल ते निर्णायक सैन्य कार्रवाई दस्सेआ। उनें आखेआ जे आपरेशन सिंदूर छड़ी फौजी कार्रवाई गै नेई हा, सगुआं एह भारत दी सम्प्रभुता, पंछान ते नागरिकें प्रति सरकार दी बचनबद्धता दे कन्नोकन्नी आतंकवाद खलाफ भारत दी सख्त नीति दा असरदार ते निर्णायक प्रदर्शन हा। रक्षा मंत्री होरें आखेआ जे पहलगाम आतंकी हमले खलाफ कीती गेदी सैन्य कार्रवाई च भारतीय सशस्त्र बलें आतंकवादियें दे

9 ठिकानें गी तबाह करी दिता हा। तोआईं, बक्ख-बक्ख मुद्दें पर विपक्ष दी डंड रौली दे बाद राज्यसभा दी कार्रवाई दिन भरै लेई स्थगित करी दिती गई ऐ। एहदे शा पैहले दुई बारी स्थगित होने परेंत जिसलै दपैहरी 2 बजे मगरा सदन दी कार्रवाई शुरू होई ते पीठासीन अधिकारी भुवनेश्वर कलिता होरें समुंद्री माल परिवहन विधेयक 2025 पर चर्चा ते पारित कराने लेई कार्रवाई शुरू करनी चाही पर विपक्ष नै डंड रौली पाई रक्खी जेदे कारण सदन दी कार्रवाई दिन भरै लेई स्थगित करी दिती गई।

<><><><><><>

Rijju-Opposition

संसदीय मामलें दे मंत्री किरेंन रिजिजू होरें कांग्रेस समेत विरोधी पार्टिं पर संसद च आपरेशन सिंदूर पर चर्चा च हिस्सा नेई लैने दा आरोप लाया ऐ। मीडिया कन्नै गल्ल करदे होई रिजिजू होरें आखेआ जे जियां गै सदन च आपरेशन सिंदूर पर चर्चा शुरू होने आहली ही, उसलै विपक्ष अपना नमा एजेंडा लेइयै आया ते बिहार च मतदाता सूची दे नमे सिरेआ निरीक्षण पर चर्चा दी मंग करन लगी पेआ। उनें आखेआ जे विपक्षी पार्टिं दी मंग ही जे आपरेशन सिंदूर पर चर्चा होऐ, पर हून चर्चा च हिस्सा लैने कोला खिसका करदे न।

<><><><><><>

Joshi-Opp

केंद्री मंत्री प्रहलाद जोशी होरें आपरेशन सिंदूर पर कांग्रेसी नेता पी. चिदंबरम हुंदे बयान दी सख्त निंदेआ कीती ऐ। संसद दे बाहर संवाददाताएं कन्नै गल्लबात करदे होई जोशी होरें अज्ज आखेआ जे कांग्रेस दे सीनियर नेता गी इस गल्लै दा एहसास होना लोइचदा

जे इस चाल्ली दे बयान पाकिस्तान दे रमै गी गी बढावा देंगन। बीजेपी सांसद अनुराग सिंह ठाकुर होरें भारत थेआरबंद बलें दी दलेरी ते काबलियत पर सोआल पुट्टने पर कांग्रेस दी सख्त नुख्ताचीनी कीती। संसद दे बाहर कांग्रेसी नेता दी टिप्पणी पर पुच्छे गेदे सोआल दे परते च ठाकुर होरें आखेआ जे एह बड़ी मंदे भागें आहली गल्ल ऐ जे देश दी रक्षा लेई सहाड़े सैनिक जिसलै कोई कारवाई करदी ऐ तां कांग्रेस उंदे बारै गै सबूत मंगन लग्गदी ऐ। बीजेपी नेता राजीव प्रताप रूढी होरें बी कांग्रेस दी निंदेआ कीती।

<><><><><><>

Skill Development

सरकारै आखेआ ऐ जे पिछले 5एं बरें च प्रधानमंत्री हुनर विकास योजना दे तैहत 53 लकख कोला मते नोजवानें गी सिखलाई दिती गई ऐ। हुनर विकास ते उद्यमता राज्यमंत्री जयंत चौधरी होरें अजज लोकसभा च एह जानकारी दिंदे होई आखेआ जे एह योजना ग्रामीण इलाके समेत समूलचे मुल्खै च नोजवानें अंदर हुनर विकास करने लेई सिखलाई सरबंधी एह कार्यक्रम 2015 च शुरू कीता गेआ हा। उनें दस्सेआ जे लौहकी अवधि आहले सिखलाई हासल कार्यक्रमें च ट्रेनिंग लेई चुके दे 56 लकख मेदवारें च 24 लकख कोला मते गी नौकरी बी थहोई गेदी ऐ।

<><><><><><>